

**Uunga siunnersuut: Inatsisartut Naalakkersuisullu pillugit Inatsisartut inatsisaata allanngortinneqarneranik Inatsisartut inatsisaat, nr. xx, uu. qqqq 2020-meersoq**  
(Kukkunersiuinermut Ataatsimiititaliap piginnaatitaanera aamma paasissutissanik atortussanillu piunasaqarsinnaatitaanera)

### **Saqqummiussissut**

(Inatsisartut Siulittaasuut)

### **Siullermeerinnineq**

Inatsisartut Naalakkersuisullu pillugit Inatsisartut inatsisaata allanngortinneqarneranik Inatsisartut inatsisissaannut siunnersuut Siulittaasoqarfik sinnerlugu matumuuna saqqummiutissavara.

Siunnersuutip saqqummiunneqarneranut tunngaviuvoq 2020-mut nipsisattassiissutinik Naalakkersuisut qaffaanerannut atatillugu peqataasinnaanermik misissuineramik Kukkunersiuinermut Ataatsimiititaliap oqaluuserinninneranut atatillugu Naalakkersuisunit atortussanik tunineqarnissaminik ataatsimiititaliap piunasaqarsinnaanera, taamatullu aamma peqataasinnaanermik apeqqummik oqaluuserinninnissamik ataatsimiititaliap piginnaatitaanera apeqqusermassuk.

Nalorngissuteqarneq isumaqarnarpoq annerusumik Kukkunersiuinermut Ataatsimiititaliap inatsisit eqqarsaatigalugit isornarsinnaasunik kukkunersiuilluni misissuineramik taaneqartartunik aallartitsisinnaanermut oqaluuserinnissinnaanermulluunniit, taamatullu aamma tamatumunnga atatillugu paasissutissanik atortussanillu pissarsiniarsinnaanermut piginnaatitaaneranut attuumassuteqartoq.

Kukkunersiuinermut Ataatsimiititaliap piginnaatitaanera aamma paasissutissanik atortussanillu pissarsisinnaatitaanera eqqarsaatigalugit nalorngissuteqarnerit suugaluartulluunniit naleqqutinngilluinnarput, nakkutilliisussaatitaaneq ataatsimiititaliap isumagisassarisa taamatullu aamma Inatsisartut Naalakkersuisullu akornanni ingerlalluartumik suleqatigiinnissaq eqqarsaatigalugit. Taamaattumik Inatsisartut Siulittaasoqarfiata tamatumunnga inatsisiliornikkut killiliussat sapinngisamik piaarnerpaamik erseqqissarneqarnissaat pisariaqartissimavaa.

Siunnersuutikkut erseqqissarneqarpoq:

- Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni § 39, imm. 1 naapertorlugu Nunatta Karsiata naatsorsuutaanik taakkunungalugu kukkumersiuusup oqaaseqaataanik ataatsimiititaliap ukiumoortumik misissuataarinnittarneranut inatsisit eqqarsaatigalugit isornarsinnaasunik kukkumersiuineq eqqarsaatigalugu kukkumersiuusup oqaaseqaatai aamma ilaasut.
- Ataatsimiititaliap tamatuma saniatigut qaqugukkulluunniit ingerlatsinermik kukkumersiuinermik aallartitsiinnarani oqaluuserinniinnarluniluunniit, kisianni aamma inatsisit eqqarsaatigalugit isornarsinnaasunik kukkumersiuilluni misissuinerinik aallartitsillunilu oqaluuserinnissinnaasoq.
- Ataatsimiititaliap kukkumersiuusup Inatsisartut toqqagaat tamatuminnga qinnuiginngikkaluarlugu atortussanik pissarsiniarsinnaatitaanera Nunatta Karsiata naatsorsuutaanik taakkunungalugu kukkumersiuusup oqaaseqaataanik ataatsimiititaliap ukiumoortumik misissuataarineranut atuuttoq taamatullu aamma ingerlatsinermik kukkumersiuilluni misissuinerit aamma inatsisit eqqarsaatigalugit isornarsinnaasunik kukkumersiuilluni misissuinerit ataatsimiititaliap aallartitai oqaluuserisaaluunniit eqqarsaatigalugit atuulluni.
- Naalakkersuisut ataatsimiititaliap qinnuteqarneratigut pisussaaffeqartut atortussat suqaluartulluunniit ataatsimiititaliap suliassaminik isumaginninneranut pingaarutillit tunniunnissaannut.

Siunnersuut sukumiinerusumik misissuataarusunneqassappat inatsimmut nassuiaatit innersuussutigaaqka.

Taamatut naatsumik oqaaseqarlunga Siulittaasoqarfik sinnerlugu siunnersuut Inatsisartunut oqaluuserisassanngortippara.